

# PET OSOBA UHAPSENO ZBOG KORUPCIJE

**Privedeni Boris Kordić i Josip Kvesić iz Službe za poslove sa strancima BiH, te Vlatka Puljić, Luca Cobre i Ana Miličević**

Pripadnici Državne agencije za istrage i zaštitu (SIPA) jučer su u akciji kodnog naziva Pelegrino, a po nalogu Tužilaštva BiH, priveli pet osoba osumnjičenih za organizirani kriminal, zloupotrebu položaja ili ovlaštenja, primanje dara ili drugih oblika koristi, te iznuda. SIPA je uhapsila šefa mostarskog Terenskog ureda Službe za poslove sa strancima BiH Borisa Kordića (1978), osumnjičenog da je ucjenjivao strance koji su držali hotele i motele po Međugorju, te da je od njih tražio i po nekoliko desetina hiljada maraka, kako bi im omogućio prava na boravište i rad u Hercegovini.

## Pretres lokacija

Uhapšen je i Josip Kvesić (1980), inspektor mostarskog TC-a SPSBiH, te V. P. (1987), A. M. (1989) i strani državljanin L. C. (1969). Nezvanično saznajemo da se radi o Vlatki Puljić, Ani Miličević, te Luci Cobre. U akciji je pretreseno devet lokacija na području Međugorja, Mostara, Čitluka i Širokog Brijega, te službene prostorije TC-a Službe za poslove sa strancima u Mostaru, s ciljem pronalaženja predmeta koji mogu poslužiti kao dokaz u daljem postupku. Uhapšeni su privedeni na saslušanje u SIPA, nakon čega će biti predati u Tužilaštvo BiH, gdje će naknadno biti odlučeno da li će im biti predloženo određivanje pri-

tvora. Prvi čovjek Službe za poslove sa strancima BiH Dragan Mektić je za Oslobodjenje kazao da su Kordić i Kvesić u nezakonitim radnjama uhvaćeni još prije šest mjeseci. On pojašnjava da je interni inspektorat SPSBiH tokom kontrole došao do saznanja da osumnjičena dvojka obavlja nezakonite radnje, a postepeno su se u istragu uključili SIPA i Tužilaštvo.

- Bilo je ili da se obračunamo sa ovom veoma dobro organiziranom grupom ili da to sve gurnemo pod tepih. Ovo je poruka da će sa svima koji se upuste u ovakvo nešto biti isto učinjeno,

istakao je Mektić.

## Pokloni ugostitelja

Kako saznajemo, kada bi uhvatili poduzetnike u nezakonitostima, Kordić i Kvesić su ih ucjenjivali i za stvari koje su ova dvojica bila dužna uraditi. Od njih su tražili novac kako bi im osigurali i ono što su po zakonu imali pravo, ali i kako bi im progledali kroz prste za nepravilnosti. Koliko je tačno ova grupa iznudila novca, jučer se nije moglo saznati, a navodno se radi o velikoj sumi, te nizu poklona koji su osumnjičeni dobili.

**A. B. Č.**

